

Dilanti mayornan y famia orguyoso

Demostracion di e tres grupo di Formacion Social na Mariniers Kazerne



E proyecto Formacion Social a cuminsa cu su di tres grupo di hoben dia 7 di januari di e aña aki. Despues di tres siman di training intensivo na Mariniers Kazerne, mayornan y famia a wordo invita pa pasa na Kazerne y mira tur loke e hobennan a siña te awor. Un total di 19 hoben ta forma parti di e di tres grupo di Formacion Social.

Diahuebs 24 di januari ultimo, Capitan Cedrick Werleman a yama e invitadonan bon bini na Kazerne. Pa despues duna un splicacion di e training cu e hobennan ta hayando, poniendo enfasis riba e parti di disciplina, structura y respet. Norma y balornan ta halto riba e programa di Formacion Social. Bureau Sociale Vorming y Arumil a wordo gradici pa Capitan

Werleman pa nan aporte.

Jessy Ras, lider di e proyecto Formacion Social tambe a hiba palabra. El a duna un splicacion di e di dos fase di e proyecto cu t'e parti di educacion y stage. Jessy Ras a gradici e team cu ta trahando cu e hobennan pa su esfuerso.

“Mi ta mira akiden hobennan motiva y esey pa mi ta un bon señal. Un señal cu hunto nos ta haciendo algo bon”. Ras a pone hopi atencion riba e rol importante cu famia ta hunga.

E nucleo familiar ta clave den un proyecto asina. Mescos cu e team cu ta guia e hobennan den e proceso, e famia mester sigui encurasha nan pa sigui riba e caminda cu nan a scoge pa cana.

“Ya caba mi ta mira e cambio riba cara di e hobennan. Nos ta riba e bon caminda”, Jessy a bisa.

Despues a sigui e parti di demostracion. Un hoben a marcha bin dilanti y duna un splicacion tocante e forma di marcha y e posicion cu mester tuma. E invitadonan a haya un demostracion di loke camuflahe ta encera.

Dos hoben a demostra esaki den un mata. Dos otro hoben a duna un splicacion di e cuminda cu nan ta hiba ora nan bay mondi. Cada un ta haya un cahita cu cuminda cu mester wanta nan 24 ora. Nan a pasa rond cu e contenido di e cahita y laga tur presente purba algo. Un otro hoben a haci un demostracion

con nan ta cushina den mondi. Despues di tur esaki tabatin oportunidad pa haci pregunta na e team y tambe n'e hobennan. Mayornan a haya e oportunidad pa tira un bista den kamber di nan yiu.

E hobennan, despues di a haci e lugar limpi, por a bay cas cu nan mayor of familiar pa diadomingo raporta bek na kazerne pa sigui cu e proyecto.

Durante e discurso y e demostracion por a nota e orguyo, alegria y emocion riba cara di e mayornan y demas famia. Formacion Social ta un proyecto di Ministerio di Asuntonan General den cooperacion cu Ministerio di Defensa Hulandes.

